

拾光集

舊照三題

其一螢橋茶座

彼岸風流略可尋，時迴客眼望遙岑。如斯逝者人連水，若夢餘生盲與瘖。一掌月光歸茗盞，半川螢火點秋心。茶香偶得清新味，掃盡層城久積陰。

其二中華商場唱片行

櫛比商廬響四馳，沿街金曲響參差。河山壞劫家何是，世代新聲命在茲。不覺童心真善美，也羅塵網欲嗔癡。老歌湔洗胸連蹇，清夢依稀似舊時。

其三牯嶺街書肆

書林薈萃早聞名，聚散真如夢一驚。春去秋來原世相，風亡雅變是民聲。長生劫滯枰中子，故國塵堆紙上兵。撫卷終知詩亦餌，張弛勾我少年情。長生劫，圍棋術語，循環相峙而勝負不分。

感 AI 軟體深諳作詩

真假誠虛妄，今生似夢遊。世多狗搖尾，誰復穗低頭。電腦興鈔錄，騷壇廢唱酬。魯先三絕藝，有我自存留。

末聯，陳廖安先生嘗言：「魯先生有三絕，有我在就不絕。」詩壇如今亦然。

臉書被刪除好友感作

曾立程門雪，而今道不同。江湖能已少，運命似漚空。緣到時機滅，詩因離亂工。初心仍未改，盡在死生中。

歲末

秋殘諸事亂，桌案任隨緣。恍惚仍前景，蒼茫又一年。順風知戢翼，老境戒貪眠。唯願常閒散，不為天下先。

感事

騷壇盛世挽無迴，離亂簪纓取次摧。附蟻柱難扶大廈，凌霄志卻困庸才。死生何處非漚影，興廢有時餘劫灰。真到傾頽成命定，千般又是悔嗟來。

夜雨

入世難能氣浩然，流珠燈火濕殘眠。欲深秋綠唯雲雨，不合孤懷是命緣。事到功時人近毀，天歸晦處月將圓。名心不斷詩心斷，再拾沉潛耕法田。

不棄園感賦二章

其一

曾看塵滿牖，春煦不堪臨。涸轍身唯苦，逢辰緣自深。卷舒非病葉，拂拭是初心。棘刺休捐棄，生生細探尋。

其二

豐儉原天命，新生不棄廬。世還多困蹇，人亦有凋疏。斗室催蘭晚，清蟬報夏初。心魔蔓如草，所賴靜耕鋤。

和李生用高中生不知大禹事

綠肥紅熾早亡津，劫火獨寬愚魯民。禹跡由來無渡海，不知魏晉莫論秦。

讀黃生詩調用典避顯

困蹇泥塗奈命何，何妨曳尾且清歌。此生終似登臺唱，入戲深時愁苦多。

新綠

病枝如戟孰招魂，一點春回渲有痕。雨霽催成青悄悄，迎光敲戶且開門。

張師有詩見賜敬次其韻

八風不動豈心驚，豎子猥蒙青眼橫。尚可入山為小草，未堪成聖是多情。頽波仍待中流鎮，亂蟻忍看大廈傾。低首平生風與義，且斟茶釃洗虛名。

樸公作詩見贈敬步其韻

四葉催成詩意開，花泥之際證如來。人間小草真無數，遠志唯君不見猜。

詩書展寄蔡兄

出腕雲龍破紙騰，詩書末劫感傳燈。帖於神會古能友，筭到時逢天亦凌。世道半糟情半酒，青春如水夢如冰。澆餘壘塊陳年垢，幸得同人一洗膺。

詩書展謝陳兄賜書

神采書之妙，知音若幾何。炮莊生氣韻，橫戟蘊中酥。清絕天南筆，蒼茫鯤北歌。凌夷風雅外，自有骨嵯峨。

季秋感田荒事

林禽啼異舊音聲，魂膽幾淪沽直鳴。鳳去臺空多毀譽，田荒樹老半枯榮。步唯須退秧方長，行不愧心慧始生。燭火飄搖天向晚，傳燈尤重是傳情。

詩書展後作

境入光塵漸斂鋒，欲窮奇氣宕群峰。雨盦珍帚餘波在，自有風騷繼舊蹤。

望雨

龍翻天硯渲雲鱗，為要凡間洗垢塵。貴賤同人聽淅瀝，風雷一筆懾精神。事無計算心垂老，情不猜疑愛未真。舊夢卅年如鐵瓦，晴初雨後鏽痕新。

和黎生

搖夏南風不滿衣，神昏案牘和吟稀。古亭螢火曾清淡，新店茶煙半翠微。直道奈心偏得意，窮詩看月莽侵扉。艱虞世事知音少，此子無非誰與歸。

名賢書跡展後作

落帽風流久咽聲，徒從翰墨辨群英。夢迷瀛外炊前黍，吟冷天南劫後生。局幾何殘唯棄子，詩如此瘦始鍾情。命緣一線絲纏累，蝶翅難逃繭縛輕。

次韻溫生贈行

路歧知返亦豪雄，莫辨前程迷與空。杯貯鯤鯨無盡月，情分瀛海未央風。可憐眼老群芳譜，不及襟疏萬綠叢。跌宕胸生千壘塊，依依斂入楮毫中。

研究室偶作

層樓環伺障山林，燠熱推窗款款侵。俗累難同蟬殼蛻，餘情徒與玉煙沉。半章謬論黃唯懶，一角遠巒青不深。文字泓浮常惑溺，也知關竅是清心。

盧生以詩溥心畬鍾馗圖見示步韻一首

襟懷仍是舊衣冠，欲蛻前生作太難。渡海王孫居鬼域，朦朧老眼昧然看。

黃師招飲賦謝

華燈恍惚夜江南，一曲清吟付笑談。鮭菜欲銷唯腹笥，風流能掬盃朋簪。年來養拙心常遠，情到投機酒易酣。生也有涯何所寄，舊詩翰墨兩相堪。

莫兄設席不赴有詩以贈感君將別慨步二首

人間難繫是雲情，誤認來程作去程。大塊嶺南誰領會，好風歸送鳳雛鳴。每慚乞酒潤詩情，遙餞雲霄萬里程。風義平生師亦友，音知自有會心鳴。

黃師贈書賦謝

風流搖筆入迷癡，盪月吟聲起墨池。世道險時酬樸厚，工夫深處見平夷。漸諳人味非天味，焉望塗知但自知。卿意由來無可敗，後生不怯寄新詩。

阿伯勒花落感賦

流光如水樹如篩，萬點飛英未可追。花謝或知春亦累，逢迎虛費半生癡。

香江

人微如蟻動沉憂，萬柱擎空落日收。銀燭欲燃天不夜，香江如寐夢無舟。低回
膏澤應垂淚，黯淡芯光誰剔頭。疫息歸來多鬼魅，當年風色怯回眸。

仙人掌開花喜賦

身本粗頑樗櫟才，逢人棘刺起嫌猜。分明愛恨藏初性，隱約浮沈掩未孩。一片
粉花長放綻，經年赤手細澆培。新生未信仙家露，緣有春風化雨來。

花蓮道中

窗涎如淚渲愁襟，薄暝青眉螺黛深。急雨壓山雲起沫，倦遊斂翮夜歸禽。光塵
何異雙為累，璞玷一生皆本心。回首迷途知遠否，矇矓眼底看差參。

花蓮會中

聲語平疏悶欲眠，可憐睫眊不相連。詩懷宜臥青茵軟，筍腹當爭明月圓。沉霧
迷情騰杳杳，流光入雨逝涓涓。他人醉也如應我，閱世何妨一惘然。

四月廿八夜夢陳師命授詩以勤，時師逝數年矣

盈盈河漢權能憑，夢寐無端說杜陵。聚散渾忘分世路，死生焉負遞心燈。依稀
談笑真如舊，咫尺容顏疑未曾。不畏前行深晦暗，慈恩寺塔有傳承。

農家絕句五首

樓館繁華舊水城，江皋野色畫難成。草香花落春泥軟，霧鎖秧苗綠未明。
野水添畦綠鴨浮，石橋沉影碎萍流。風搖蘆渚歸船穩，一脈溪光萬頃秋。
千疊雲霞散綺紅，秋聲吹散稻香風。微光竹徑迷新碧，燈火村橋一釣翁。
老農牽犢步綠莎，鷺鷥動處漾清波。浮天光影春無際，蓬艇歸收夕照多。
搖蕩溪聲畫槳柔，飛花十里點瓊樓。連天稻浪波千頃，閒看耕童散放牛。

和黃生朝陽後山

澹蕩雲天曉氣浮，無端鶯語亂梢頭。東風吹皺櫻排闥，一片緋紅洗舊愁。

台北國際書展歸後作

久擁書城御字兵，也曾响沫換簪纓。此心跌宕歸平澹，坐望波煙緩緩生。

當下四首

其一

曾是雲霞與燕飛，殘杯難貯月清輝。書徒日過年徒長，詩漸俗趨腰漸圍。舊夢
何堪人共語，青春無奈意多違。淚深前路真迷眼，勸我羞囊不可歸。

其二

執到深時緣似無，劫灰隨雨付江湖。雲山亂倒春秋局，歲月顛翻水墨圖。難拾

悠閒成運命，願拋聰慧作糊塗。雙瞳有刺誠宜廢，濁世由來目可誅。

其三

人間無事似當初，願景浮煙散渺如。世道能通財色酒，檯盤不上畫詩書。滴階
春雨勾前夢，催命泥途困蹇驢。境入中年歡會少，何將鬱結一清梳。

其四

心緒翻騰只暗藏，塵寰萬事屬哀傷。早從螢幕傷肩頸，更向人言壞胃腸。凡骨
琢雕徒碎屑，花魂淬鍊為清香。年來愛憎俱成魔，合把餘生葬睡鄉。